

畿輔通志卷十一

帝制紀十一

宸章四

仁宗睿皇帝御製文

讀荆軻傳

余讀太史公荆卿傳慨然三歎曰嗟乎戰國縱橫秦爲最諸侯受其荼毒連兵西向至函谷而卻走莫敢正視而燕太子丹國小力弱勢不獨存而欲報其宿怨洩天下之忿其立志可悲也然而不自量力欲以赤手生搏虎蛟卒之身死國喪宗社邱墟計亦拙矣使太子丹聽鞠武之言卧薪嘗膽效越句踐燕昭王之事以合縱於諸侯或能大有所爲讎可報而國再振矣而田光智深勇沈太子丹執弟子禮以師事之光感其義薦荆卿焉光以太子疑已而

殺身以滅其口此匹夫之勇非豪傑之行也以金珠采玉寶馬之
肝美人之手投其所好以重結而深信之固其志堅其心荆卿雖
欲辭之是負其義也以樊將軍之頭督亢之地圖重利以要之亦
奇策也奈荆卿之技不足恃而秦王之驚悍可畏天方醉秦將奈
何哉易水之歌足以見其必死之志矣卒之事不濟而秦益兵以
圍燕逐之海濱卒斬丹之頭以謝而燕隨而亡矣嗚呼荆卿受太
子之重託不自量力自揣不能則當固卻之何爲激於一言以人
國爲兒戲挾匹夫之諒而逞於一擊之間欲報見陵之愧徒以身
殉之而召公之基業因是以亡太子丹田光樊將軍因是以死荆
軻雖死不足謝其萬一也其視曹沫藺相如不可同年而語矣宜
乎爲句踐之所笑也

張華論

士君子立於朝廷固當盡忠竭智亦必審天時察人事不可貪位
取咎徒爲後人所惜非明乎事理決於去就者豈能免於失身哉
當亂之將萌旣不能弭患於未然又不能剪除乎惡逆而徒尸居
委蛇死而無益於國若張華者豈不痛哉華負其才名昧於禍機
羣小得志國祚將傾而安處高位自謂有如丹之忠而無保身之
哲遂使奸雄肆惡華死之後晉室播遷誰釀之也華少通經籍明
天人之學彊記默識算無遺策故伐吳之役武帝與之協謀力阻
眾議而兵興之日量計運漕決定廟算雖蕭何之功殆將庶幾賈
充陷害武帝不聽用其計卒能平吳天下一統論功行賞匹於羊
祜名重一時聲譽日盛及帝問以誰可託後事乃薦齊王攸由是
微爲忤旨出爲幽州都督護烏桓校尉華撫納新舊戎夏懷之朝
野咸歸望焉後帝因馮紘之譖徵入爲太常因事免官及惠帝卽

位以爲太子少傅楊駿被誅賈氏將廢太后華力諫不從太后竟爲賈氏所弑人倫乖喪綱常斷絕賈氏之罪天地不容晉惠之昏周幽爲甚華以先世老臣深明理數當此之時闇主虐后奸人權宦布滿於朝豈不知天下之亂將起爲華者力能救則救之不能則去之進不違忠退不失義大臣之道也而徒區區作女史箴以爲賊后諷彌縫補闕自謂無患及賈氏謀廢太子劉卞之策雖屬行險而式乾之諫豈能救乎後聽人言欲除趙王倫孫秀而不果及倫廢賈氏辭連及華誣爲逆黨遂至喪身豈不深可惜哉初華之未敗也其少子遯以中台星折勸令遜位乃以天道幽遠不如靜以待之不從其言夫華夙稱博物洽聞而反不如孺子之識何哉蓋貪位愛身勢令智昏自取夷滅耳誠能聽其子之言遜位高蹈豈不全身保節終爲晉之純臣惟其見幾不明甘心亂朝同流

合污莫能區別雖身死無補不可爲義不知者猶以爲賈氏之黨
吾獨爲華冤之若明去就之分察治亂之原爲賈氏而死何如爲
適而死況未必死也嗚呼士君子致身於朝不可恃才名而志功
利遇急難之時適足以爲累若華者雖學業優博辭藻溫麗亦有
愧於鷦鷯之賦矣亂世之臣竭忠爲難張華負德望踐台輔當賈
氏弑太后殺太子之時不可進而進及力不能挽天變數見可以
去而不去是華之過也晉室諸臣吾深有慨於茂先故表而出之
著其成敗之由爲擇義不精者戒

擬新建辟雍碑記

太學之有辟雍古之制也國家定鼎燕京立太學以教士化民而
於建辟雍有未遑焉茲承百年熙和之會正興禮樂以牖民迪俗
之時自邦畿以及直省郡邑開表海澨皆有學宮太學在京師萬

民所景仰其制不可不備也參古準今胥不可緩記曰天子曰辟
雍夫三代以下治不及古不先圖治安民而皇皇焉興學崇文者
有之亦有泥古以求治失之遠矣今則重熙累洽同軌同文教之
以禮義化之以詩書建辟雍以象天運敷教化於流水之源明其
制度用古而非泥於古也稽古之道必明本而達用知古今之時
不同則敦風俗正人心紀綱振而舉錯宜用古以治今惟酌其理
而已辟雍之建所以紀周軌同文之盛昭示來學非徒崇古之迹
也若泥於是則井田封建胥可行乎更不待言矣語曰正其本萬
事理差之毫釐謬以千里以是爲政以是爲教爰勒石成均以誌
歲月

仁宗睿皇帝御製詩

石槽行宮晚坐書懷

避暑雁行隨始自辛酉歲流陰十六年歡笑借兄弟承

恩總萬民一心慎統系分封各沐榮留京典宿衛

辛酉歲蒙恩封嘉親王同時

十一兄封成親王今年春正予仰膺隨皇父巡幸熱河而兄奉

慈命紹承大統茲恭勅旨留京總理事務

茲來憶昔時吟射相游藝臨風有所思和樂懷古隸

河決歎

皇考付鴻基兢業勉圖治眇躬才德疏愆尤日叢積干戈未全消國

家又有事季夏月之初霖雨晝夜漬波瀾漲百川放溜如奔驥西

北匯大河桑乾隄潰四白浪掀石欄蕩漾洪濤恣

連日雨大水漲因命侍衛大臣

等馳往查勘報稱西路永定河隄開口四段衝決蘆溝橋石欄下流村莊盡被其害

哀哉我黔黎昏墊溝壑

墜愧予咎日深罹此非常異示警衷敬承敢怨蛟龍崇分命八京

卿以實查災被撫恤盡苦心奚能得飽飼一人罪益滋何辜辜眾

累連朝失神魂食少難成寐泣思乾隆年屢豐多上理

龍馭杳莫攀仰空揮涕淚艱難身願當餘事所安置字字皆血誠言
言非虛僞告我眾臣工展猷集謀議竭力挽災屯靜候

昊恩賜

侍郎那彥寶等奏報永定河秋汎安瀾詩誌感慰

去夏河四決泛溢徧畿南興工可代賑築隄聚丁男今歲雨晴洽

恬波

天澤含中汎旣暢往汎期已過三

謂桃汎伏
汎秋汎

新工普鞏固安瀾具奏

函感

貺辦香謝甄敘恩施覃敬願河永定刷沙免浸滄禾稔救荒歉稍

慰予衷慚

永定河自去歲夏秋泛溢卽命侍郎那彥寶等督率河
工員弁集料搶築旋於十月立冬前合龍惟河水消長

靡常時爲塵注今歲汎期仍分命該侍郎等輪流赴工督視巡查

相機防護桃汎二汎先報安瀾茲復據侍郎那彥寶等奏報因秋

汎尤關緊要加意巡防凡新舊各工段遇有溜勢頂衝湍險要
處所隨時隨地相度修防俾添築掃蠲舊有隄工悉皆堅實以資

捍禦而衛民生今幸汛期大溜漸消各隄防俱臻鞏固恬流順軌
永奏平成臣民無不同深歡慶因降旨敬發大藏香答謝神貺虔
申誠悃在工諸臣及各員弁分別加
恩甄敘用酬勞績以答
天庥

關內

關外田喜佳關內田益好近畿屢豐年深澤荷

蒼昊三時民亦勞西成收及早倉箱旣充盈塲積餘黍稻又沐免租
恩吏胥罷催討民爲國之本穀爲國之寶教養已兼施慈少復安
老漸可臻大同舍此無他道寰宇數萬遙衣食鮮溫飽郅治誠艱
哉懍

訓思懷保

夏店道中

行行秋景佳天宇陰晴變迢迢阡陌中鳴梢拂柳線清商漸瀝來
納爽風拂面豐年萬寶登黃雲徧芳甸野蔬各分圻生意同葱蒨

繡野足清幽蛺蝶參差見瞬息三十里小隊歷夏店成鎮數十家
比戶耕汲便禪關試叩之小憩空王殿

懷柔詠古

懷柔隸京邑昔號彈汗城古今時事異山澤無變更版圖聯中外
要荒奉大清

列聖久培養德化洽八瀛我

考拓西域二萬置屯營眇躬荷基業兢惕彌持盈秋巡旋翠罕暢觀
稼穡成授時益保泰仔肩切敬誠

密雲道中

晨風拂面涼朝日迎眸朗鳴騶指修途蕩蕩平如掌官渡同白河
浪翻金滉漾分潤禾黍繁禾沐恩波養義我白檀城行館開清爽

獨樂寺

古剎薊城中誰與題獨樂釋氏惟兼愛於意無住著發彼三藐心
欲解四輪縛丈六亦非身巍然立高閣摩尼一串珠曼陀萬花落
菩提寂無聞人天振梵鐸怡情聊詠之吾道在咸若

渡灤水

灤水清且深天光映耿耿鳴鞭渡浮梁初旭照人影年來塞上遊
風物已慣領東望路紆迴雙塢標孤嶺仙莊解征鞍喜覩清涼境
北窻拂我牀攤書忘日永

灤陽別墅

行殿灤水陽虛窻納秋爽時雨潤高田雲光含旭朗積潦收大川
清波浮潋沔村墟多稼盈庶可望豐穰明晨莅山莊綏懷布澤廣
迴思沐

考恩愴念感既往

河間道中詠古

曉星明遠林東望天涯紫迢迢古河間獻王有故里招賢好詩書
三雍上金祀日華問遺居幾株紅杏矣花謝春復榮虛譽安可恃
我來感前人曷敢論臧否

恭和

御製過永平府詠事元韻

天聰創業乾坤旋告

天七恨出萬全雄師八部入三邊直趨燕京攻何難六軍鼓盪能摧
堅薄城弗取致和焉神威示倣舍弗拳

帝憫萬姓德彌天以仁得之奚事虔王師回指用經權夜趨永平奇
兵連一戰克取黔黎安息眾饒歌返旌旃折衝留守

命重臣

聖諭嚴誠毋殺殘復設重鎮調大員償轅敗事啟爭端明師乘勢幸
復還轉敗無計阬守官夜棄三郡歸汗顏

天威震怒申命宣功成不易惜棄捐拘囚赦死懲且勸

文皇功烈巍巍然宸懷念

祖述辛艱熙朝萬世承乾乾

海子行

永定門外南海子地勢沮洳眾流委辛酉季夏被澇災大隄潰決
汎洪水東下直灌北紅門浩瀚奔騰巨波瀾今來觸目倍驚心舊
河淤墊新河徙石橋空置駕浮梁小易滄桑倏如是人君治世總
奉

天敬體盈虛慎顧諟

還圓明園路經草橋一帶卽目成什

酉年夏月被澇災京邑西南汎平陸村舍蕩析憫流離煮賑散錢
繼施粥攬轡經臨心惻然斷壁頽垣破茅屋前歲霍潦實異常至
今元氣未能復近郊罹患尙如斯顛連無告嗟遠服對茲增懼思
民艱願

錫綏豐敷景福

小民衣食維人君深恤其艱裕其源節其用斯無匱
乏然總賴上蒼仁愛綏萬屢豐盈甯共慶庶

慰予如
傷之抱

觀民

幾甸黔黎沐德化比戶安閒事耕稼不染邪說循正途可希上古
淳風亞清蹕時巡度村墟扶攜老幼道左迓蠲租敬體我

考慈如保赤子勤夙夜

望西山積雪作歌

春仲雨成雪遙峯裊玉鬢卻是前人詠高處不勝寒暖日烘雲見

睨消盈溪滙澗如奔潮灌注昆明遂東下支分畦隴滋新苗千崖
出沐爭蒼翠罨畫巒尖競秀麗眺覽非貪景物饒幸占佳兆豐年
瑞

夏店道中卽目

青郊遠近連村店緩策花驄問郵傳春和佳景隨處宜豐稔風光
欣目見去冬瑞雪三輔優宿麥新苗遍芳甸今春膏澤又連絲阡
隴滋培耕作便坡陀高下盡潤含淺水蹙波光潏灩但看林靄冪
山腰不覺飛沙撲人面春雨霏如珠玉珍何幸重蒙天澤徧盱衡
九有沐

皇恩額禱盈甯盡歡忭西晉臺懷想更佳隨輦衢歌傳夏諺

薊門歌

大野蒼茫捲寒霧鳴鞭北指薊門路薊門云是古戰場只餘漠漠

黃雲戍村墟鱗比淨烽煙耕鑿盈甯逾百年重闔高接長霄朗中
有古刹瞻巍然古刹何名名獨樂丹碧輝煌結層閣擘窠四字厯
千秋相傳太白雄筆落我來喜趁冬旭融僧房一曲幽逕通品茶
小住多佳趣路啟雲嵐東復東

隆福寺行宮登樓對雨吟

四山風送山雨急潤繼前宵徧原隰當春此景不易逢貽我來牟
收玉粒長途微瀟豈辭勞稅駕行宮俯綠臯層樓每至必登眺拾
級一覽峯巒高松濤含煙盈几席林霧低羃雲無隙簷端銀竹已
傳聲遙看宿麥增新碧北省欣蒙天澤優春膏旣足兆有秋還祈
洗兵慰

聖念嘉音卽日來官郵

長城歌

萬里連緜置戍長東接山海西甘涼勞民疲力奮白旌萬世不基
二世亡乃知在德不在險祖龍侈願終荒唐雉堞排空果何用漫
論南北分巖疆我朝承

天大一統西踰沙海東扶桑中外不殊若戶闥

列聖厚澤施汪洋

皇父敬述益博厚六十餘年

德化揚雄關稽古存其概懷柔每歲臨山莊扈隨拈管紀事實殫心

繼序敢不裒

自秦築長城無論漢魏晉唐宋元明皆藉宇險間隔中外考宋史宣和三年金敗遼兵於古北口嘉定二

年蒙古侵金至古北口金人退保居庸關致和元年托克托陸爾

守古北口與上都兵戰於宜興是遼金元亦未嘗不以此為險隘

惟我朝

列聖以來德威光被遐邇歸心口隘之間墩堠盡

輟

聖祖歲幸山莊避暑行獵蒙古諸部歡欣款洽如接家

人至我

皇父率祖攸行久道懷柔益覺淪肌浹髓

前以潮河盛漲舊堞衝頽僅令略為修整以存其概用誌古蹟蓋

德不在險之

至誠孚格中外一家稽諸前史實未曾有予日聆在

訓茲隨扈巡觀繼序欽承不敢不勉